

## SAMÞYKKT

### um hunda- og kattahald í Langanesbyggð.

#### I. KAFLI

##### Almennt.

###### 1. gr.

Samþykkt þessir gildir um hunda- og kattahald í Langanesbyggð.

Þéttbýlisstaðir þeir sem um ræðir í samþykkt þessari eru Bakkafjörður og Þórshöfn.

Hunda- og kattahald í Langanesbyggð sætir þeim takmörkunum sem getið er um í samþykkt þessari.

Hunda- og kattahald er háð leyfi sveitarstjórnar sem er heimilt að veita einstaklingum, 18 ára og eldri, búsettum í sveitarfélaginu, til að uppfylltum þeim skilyrðum sem samþykkt þessi kveður á um.

###### 2. gr.

Leyfi til hunda- og kattahalds er bundið við nafn og heimili leyfishafa og viðkomandi dýr og er óheimilt að framselja það.

###### 3. gr.

Hundar og kettir skulu skráðir á skrifstofu sveitarfélagsins eða hjá umboðsaðila og þar fær umsækjandi afhenta númeraða plötu sem jafnan skal vera í ól um háls dýrsins.

Við skráningu skal framvísa:

1. Undirritaðri umsókn á umsóknareyðublöðum sem má nálgast á skrifstofu sveitarfélagsins og/eða heimasíðu sveitarfélagsins.
2. Upplýsingum um heiti, kyn, tegund og önnur einkenni dýrs, sem og upplýsingar um fæðingardag dýrsins sé hann þekktur.
3. Mynd af dýrinu.
4. Vottorði frá dýralækni um örmerkingu eða húðflúrmerkingu, sbr. 3. mgr. 4. gr. reglugerðar nr. 1077/2004, um aðbúnað og umhirðu gæludýra og dýrahald í atvinnuskyni.
5. Vottorði frá dýralækni um að dýrið hafi verið hreinsað af bandormum og spóluormum.

Leyfishafi skal tilkynna sveitarfélaginu ef dýrið drepst eða flytur úr sveitarfélaginu.

Við skráningu skal umsækjandi undirrita yfirlýsingu um að hann skuli í einu og öllu fara með dýr sitt eftir fyrirmælum samþykktar þessarar ásamt lögum og reglugerðum.

###### 4. gr.

Óheimilt er að hleypa hundum eða köttum inn í húsrými eða á lóðir sem fjallað er um í fylgiskjali 3 í reglugerð nr. 941/2002 um hollustuhætti.

Heimilt er þó fötluðu fólki að hafa með sér hjálparhunda á gististaði, veitingastaði, í skóla, á snyrtistofur og hársnyrtistofur, heilbrigðisstofnanir, íþrótt- og baðstaði, fangelsi og samkomuhús, enda sé hinum fatlaða ótvíræð nauðsyn á hjálparhundi.

Heilbrigðisnefnd er þó heimilt, að fenginni beiðni hlutaðeigandi stofnunar, að veita undanþágu til að halda hunda og ketti á heilbrigðis- og meðferðarstofnunum í samræmi við 4. másl. 1. mgr. 19. gr. reglugerðar nr. 941/2002 um hollustuhætti.

Einnig er óheimilt að hleypa hundum og köttum inn í húsnæði matvælafyrirtækja, sbr. reglugerð nr. 103/2010 um gildistöku reglugerðar Evrópuþingsins og ráðsins (EB) nr. 852/2004 um hollustuhætti sem varða matvæli.

Ákvæði þessarar greinar gilda þó ekki um nytjahunda að störfum.

Framangreindir staðir eru m.a. eftirfarandi:

- a. Vatnsveitur, vatnsból og verndarsvæði þeirra, brunnar og sjóveitur.
- b. Almennings- og útisalerni.
- c. Hvers konar sorpgeymslur og sorpförgunarstaðir.
- d. Gististaðir, veitingastaðir og matsólustaðir.
- e. Tjald- og hjólhýsasvæði, nema samkvæmt ákvörðun umsjónaraðila svæðanna.

- f. Húsakynni þar sem geymd eru, framleidd eða seld matvæli.
- g. Skólar, kennslustaðir, barnaheimili og gæsluvellir.
- h. Rakarastofur, hárgreiðslustofur, svo og hvers konar snyrti- og sólbaðsstofur.
- i. Heilbrigðisstofnanir, hæli, heilsuræktar- og íþróttastöðvar og baðstaðir.
- j. Fangelsi og aðrar vistarverur handtekinna manna.
- k. Samkomuhús hvers konar og opinberar skrifstofur.
- l. Kirkjugarðar, bálstofur, líkhús og líkgeymslur.
- m. Almenningsamgöngutæki.
- n. Matvælafyrirtæki þar sem fram fer framleiðsla og dreifing matvæla.

#### 5. gr.

Um hunda- og kattahald í fjöleignarhúsum fer samkvæmt lögum nr. 26/1994, um fjöleignarhús. Ef sótt er um leyfi til að halda hund í fjölbýlishúsi skal skriflegt samþykki 2/3 íbúðareigenda með sameiginlegan inngang eða stigagang fylgja umsókn, sbr. 33. gr. a. laga nr. 26/1994, um fjöleignarhús.

#### 6. gr.

Eigendur og umráðamenn hunda og katta skulu gæta þess að dýr þeirra valdi ekki hættu eða raski ró manna eða verði mönnum til óþæginda á neinn annan hátt. Eigendum hunda og katta ber að greiða kostnað við að fjarlægja dýrið, gerist þess þörf.

#### 7. gr.

Við brot á skilyrðum fyrir leyfi til hunda- og kattahalds má fjarlægja viðkomandi dýr. Skal dýrinu komið fyrir sé um að ræða fyrsta brot og sé það minniháttar. Handsömun á ómerkту dýri skal auglýsa tryggilega, t.d. í staðarblaði. Eigandi dýrsins skal leysa það út gegn greiðslu handsömunargjalds og alls annars kostnaðar vegna brotsins. Sé um að ræða alvarlegt eða ítrekað brot, skal afturkalla viðkomandi leyfi til hunda- eða kattahalds.

Hunda sem ráðast á menn eða skepnur skal fjarlægja og er heimilt að aflífa þá þegar í stað. Önnur dýr er heimilt að afhenda ef þeirra er vitjað innan 7 daga frá því að dýrið var handsamað, enda hafi handsömunargjald og annar áfallinn kostnaður áður verið greiddur. Að öðrum kosti er heimilt að aflífa dýrið enda hafi eiganda verið gert ljóst hvað vanræksla á að vitja þess geti haft í för með sér. Kostnaður greiðist af eiganda.

Sveitarstjórn er heimilt hvenær sem er að afturkalla leyfi fyrir einstökum hundum og köttum eða öll veitt leyfi telji hún þess þörf í þágu hollustuhátta og öryggissjónarmiða.

## II. KAFLI

### Hundahald.

#### 8. gr.

Innan þéttbýlismarkna skal hundur aldrei ganga laus heldur vera í taumi í fylgd aðila sem hefur fullt vald yfir honum. Þegar hundur er í festi á lóð skal lengd festarinnar við það miðuð að óhindrað megi ganga að aðaldyrum viðkomandi húss.

Után þéttbýlismarkna er heimilt að sleppa hundi lausum undir eftirliti umsjónarmanns án þess þó að gengið sé á rétt viðkomandi landeiganda.

#### 9. gr.

Eigendum og umráðamönnum hunda er alltaf skylt að fjarlægja saur eftir hunda þeirra.

#### 10. gr.

Bannað er að fara með hunda á almennar útsamkomur í sveitarfélaginu.

#### 11. gr.

Óheimilt er að láta hunda dvelja lengur en í tvo mánuði á heimili án þess að sótt sé um leyfi fyrir þeim.

## 12. gr.

Óheimilt er að hafa fleiri en tvo hunda eldri en þriggja mánaða á sama heimili.

## 13. gr.

Eiganda hunds ber að hlíta að öðru leyti lögum og reglum er hundahald varðar, þ. á m. reglum um árlega hreinsun hunda, sbr. 57. gr. reglugerðar um hollustuhætti, og greiðslu leyfisgjalds, sbr. 19. gr., svo og þeim fyrirmælum sem heilbrigðisnefnd setur.

## 14. gr.

Sveitarstjórn getur fellt niður eða ákveðið lægra gjald fyrir nytjahunda, þ.e. hunda sem notaðir eru til löggæslu- eða björgunarstarfa og minkahunda. Af leiðsöguhundum sem blindir eða sjónþaprir nota vegna fötlunar sinnar skal ekki greiða gjald.

## 15. gr.

Eftirfarandi skilyrði gilda í dreifbýli Langanesbyggðar:

- a. Ekki þarf að sækja um leyfi fyrir hundahaldi á lögbýlum, en skylt er að skrá hundana á skrifstofu Langanesbyggðar eða hjá umboðsaðila.
- b. Ekki þarf að greiða leyfisgjald af hundum í dreifbýli. Þó skulu eigendur hunda greiða þann kostnað sem af lögbundnum hreinsunum og læknisáðgerðum hlýst, sbr. 19. gr., eftir því sem við á. Sömuleiðis ber eiganda að greiða þann kostnað sem af hlýst ef hundurinn er tekinn í vörslu eða hann aflífaður, sbr. 7. gr.
- c. Hundar í dreifbýli mega ganga lausir á landareign eigenda sinna. Að öðru leyti gilda ákvæði samþykktar þessarar eftir því sem við á.

## III. KAFLI

**Kattahald.**

## 16. gr.

Óheimilt er að hafa fleiri en tvo ketti eldri en þriggja mánaða á sama heimili.

## 17. gr.

Kettir skulu ekki vera lausir úti við í þéttbýli. Sérstaklega skulu eigendur og umráðamenn katta gæta katta sinna með tilliti til fuglalífs á varptíma.

## 18. gr.

Sveitarstjórn er heimilt að gera ráðstafanir til útrýmingar á villiköttum og er henni þá skylt að auglýsa það tryggilega, t.d. í staðarblöðum eða útvarpi.

## IV. KAFLI

**Gjaldskrá, eftirlit o.fl.**

## 19. gr.

Árlega skal sveitarsjóði greitt gjald fyrir þá hunda og ketti, sem leyfi er veitt fyrir. Sveitarstjórn ákveður árlega upphæð leyfisgjaldsins og handsömunargjald skv. 7. gr. í sérstakri gjaldskrá, sem sveitarstjórn setur samkvæmt 5. mgr. 25. gr. laga nr. 7/1998, um hollustuhætti og mengunarvarnir, og að fenginni umsögn heilbrigðisnefndar. Sveitarstjórn skal láta birta gjaldskrána í B-deild Stjórnartíðinda. Gjöld mega aldrei vera hærri en sem nemur rökstuddum kostnaði við veitta þjónustu eða framkvæmd eftirlits með einstökum þáttum. Leyfisgjaldið skal greitt í fyrsta sinn við skráningu hunds eða kattar og síðan árlega fyrirfram með gjalddaga 1. maí. Hafi gjaldið ekki verið greitt innan tveggja mánaða frá gjalddaga fellur leyfið sjálfkrafa úr gildi. Árleg bandorma- og spóluorma-hreinsun hunda og katta er skipulögð af sveitarfélaginu og er hreinsunargjald innifalið í árlegu gjaldi til sveitarsjóðs. Kjósi eigandi hunds eða kattar að láta hreinsa hundinn eða köttinn sinn annars staðar ber honum að greiða það sjálfur.

20. gr.

Heilbrigðisnefnd Norðurlands eystra fer með eftirlit með framkvæmd samþykktar þessarar samkvæmt ákvæðum laga nr. 7/1998, um hollustuhætti og mengunarvarnir.

Sveitarstjórn annast framkvæmd samþykktar þessarar og getur tilnefnt eftirlitsaðila sem fyrir hennar hönd skal sjá um að framfylgt sé ákvæðum samþykktar þessarar. Heimilt er að skipa fleiri en einn aðila til verksins og setur sveitarstjórn nánari starfsreglur. Eftirlitsaðili starfar í umboði heilbrigðisnefndar Norðurlands eystra.

21. gr.

Um valdsvið og þvingunarúrræði vísast til VI. kafla laga nr. 7/1998, um hollustuhætti og mengunarvarnir.

22. gr.

Um viðurlög vegna brota á samþykkt þessari vísast til VIII. kafla laga nr. 7/1998, um hollustuhætti og mengunarvarnir. Brot gegn samþykkt þessari varða sektum rúmist þau jafnframt innan refsíákvæða hlutaðeigandi laga, nema þyngri refsing liggja við samkvæmt öðrum lögum. Skulu þau brot sæta þeirri málsmeðferð sem boðin er í lögum nr. 88/2008, um meðferð sakamála.

Um kærumeðferð fer samkvæmt lögum nr. 7/1998, um hollustuhætti og mengunarvarnir.

23. gr.

Samþykkt þessi staðfestist hér með samkvæmt 25. gr. laga nr. 7/1998 um hollustuhætti og mengunarvarnir og öðlast þegar gildi. Frá sama tíma fellur úr gildi samþykkt nr. 181/2011 um hunda- og kattahald í Langanesbyggð.

*Umhverfis- og auðlindaráðuneytinu, 3. desember 2014.*

F. h. r.

**Sigurbjörg Sæmundsdóttir.**

*Laufey Helga Guðmundsdóttir.*